

Ina visiun senza cunfins

Cinema Sil Plaz presenta «The House in the Park»
da Hercli Bundi

■ (ac) Il cineast grischun Hercli Bundi ha realisau in film documentar davart in plazzal da construcziun en in marcau ella provinzia chinesa. La historia dil Jinhua Architecture Park valetescha il cineast grischun sco parabla per il resvegli dall'entira naziun chinesa. Hercli Bundi ei naschius e carschius si a Cuera. Sias ragischs romontschas tonschan entochen Sagogn. Il cineast ei d'annada 64 ed el ha frequentau sia scolaziun sco reschissur a Lausanne a L'Ecole cantonale d'art. El ei confundatur dalla Mira film GmbH che s'engascha ella produziun da films. La novissima ovra documentara da Hercli Bundi senumna «The House in the Park». Il film meina igl aspectatur ella provinzia chinesa, numnadamein el marcau da Jinhua. In marcau che vul segitar sia posiziun el rasant svilup economic cun in parc architectonic. Il marcau ha envidau 17 divers architects digl entir mund per realisar in parc cun pavigliuns extraordinaris per aschia carmular investurs. Cun la finamira da construir fabricas, centrums da compra e habitaziuns. Da cuminonza cun siu cussegliader ed assistent Laurence Wang Wei ha Hercli Bundi realisau enteifer ils onns 2005 entochen 2007 sur 80 uras

material d'intervesta e documentau la lavur vid il parc. A casa a Basilea ha el visitau ils architects svizzers involvai el project e schau mussar els lur plans e models. La scuntrada documentescha il cuncontrast dils dus munds e tgei che succeda sche carstgauns dil vest s'engaschan da tschella vart dil mund per contribuir alla realisaziun dil marcau futur. Il film porscha investa ella veta dils luvrers chines sin viadi dad in plazzal da construcziun tier l'auter. Luvrers indispensabels per realisar ils megaprojects chines.

Il reschissur scriva dalla historia dil parc architectonic sco parabla per il resvegli dall'entira naziun chinesa. Quei che succedi entuorn il Jinhua Architecture Park succedi en biars marcaus chines. L'idea da scaffir el nuot enzatgei dil tuttafarg niev valetescha Hercli Bundi per utopia. La fin finala stoppi era il marcau da Jinhua seconfruntar cun ils balsegns e las pretensiuns dils individis che vivan gia el liug.

«The House of the Park» ei da veser oz vendergis, ils 19 d'ust allas 20.00, sonda, ils 20 d'ust allas 17.15 e giovgia, ils 25 d'ust allas 20.00 el Cinema Sil Plaz a Glion. Oz en preschientscha dil reschissur.



«The House of the Park» dil reschissur grischun Hercli Bundi documentescha visiuns ed utopias en in marcau chines.